



Bentiaraq Ottosen

UPA 2026/121

Atassut

3. Juni 2026

Uummannami Upernavimmilu eqqakkanik ikuallaavimmik pilersitsisoqarsinnaanera pillugu apeqquteqaat aallaavingalugu oqallinnissamik siunnersuut

(Inatsisartunut ilaasortaq Aqqalu C. Jerimiassen, Atassut)

Atassummiit Aqqalu C. Jerimiassen qujassuteqarfigaarput pingaarutilimmik oqallinnissamik siunnersuuteqarmat.

Naalackersuisut avatangiisinut tunngasunik, aningaasarsiornikkut aammalu Esani aqqutigalugu ataatsimoorussamik eqqagassalerinermut tunngatillugu tunngavilersuutaat paasillaarsinnaavagut. Aamma akuersaarparput ullutsinnut naleqquttumik eqqagassalerineq avatangiisinut peqqinnissamullu illersorneqarsinnaasumik ingerlanneqartariaqartoq.

Kisianni Atassummiit isumaqarpugut Kalaallit Nunaata siunissaanut pisariaqartitai ammasumik isiginiarneqartariaqartut.

Eqqakkanut iliussissanut pilersaarut 2020- 2031 pissutsit allaanerungallarmata suliarineqarsimavoq, nunarsuarmi pissutsit ullumikkornit aalajaanneruneranni. Ullumikkut nunarsuarmi aningaasaqarnikkut nalorninartoqarpoq, niuernerup ilusaa allanngoriartorpoq, nunat akornanni pissutsit allanngorput aammalu pilersorneqarnikkut isumannaatsuunissaq pingaarneruleriartorpoq. Taamaattumik pilersaarutit ukiualuit matuma siorna suliarineqarsimasut suli Nunarput tamaat isigalungu pitsaanerpaajunersut ingerlaavartumik nalilersorneqartariaqarput.

Nunarput Europaanngilaq. Aamma USAanngilaq. Uagut nunarsuarmi avannarpasinnerpaami najugaqarpugut, nunarsuarmi allanut sanilliulluta innuttakippugut aammalu sineriapput isorartuupilussuulluni. Taamaattumik eqqagassanik passussineq, nukissiuuteqarneq aammalu attaveqaasersuutit pillugit aaqqiissuussisarnerit nunat millionilikkaanik najugaqarfiusuni atorneqartut assilillugit naleqqussarniarsarisoqarsinnaanngilaq.

Avannaani najugaqarfiit immikkut ittunik unammilligassaqarput. Sikorsuaqarneq, angallannikkut ungasissutsit, umiarsuarnik sullissinerup killilimmik periarfissaqarnera kiisalu assartuussinermut aningaasartuutit qaffasissut eqqarsaatigalugit apeqquserneqartariaqarpoq ataatsimoorussamik aaqqiissuussineq kisimi siunissami naammannersoq.

Taamaattumik Atassummiit isumaqarpugut Naalackersuisut pilersaarummik nalilersueqqinnissaminnut ammasumik isiginnittariaqartut aammalu teknologiit nutaat periarfissallu assigiinngitsut misissortariaqaraat. Tamanna Esanip taarserneqarnissaanik siunnersuuteqarnerunngilaq, kisianni siunissami nunap immikkoortuini ataasiakkaani aaqqiissutit nutaaliaasut pilersinneqarsinnaanersut misissorneqartariaqarpoq, isiginiarneqartariaqarput



eqqagassanik passussisinnaanermut tunngasut aammalu nukissiutitut pilersuinermit iluaqutaasinnaasut.

Ungasissumut isigaluta eqqarsartariaqarpugut. Eqqagassanik passussineq eqqagassaannarnut tunnganngilaq. Aamma pilersorneqarnikkut isumannaatsuunermut, nukissiuuteqarnermut, piareersimanermut aammalu najukkani inuiaqatigiinnik ineriartortitsinermit tunngavoq.

Taamaattumik Atassummiit isumaqarpugut piffissanngortoq oqallisigissallugu Nunatsinni eqqagassalerinermit nukissiuuteqarnermullu tunngasut siunissamut tunngatillugu qanoq pitsaanerpaamik aaqqissuuneqarsinnaanersut.

Oqallilluarnissaq qilanaaraarput.